

福建通志

列傳 第二十八

K295.7
1

福建列傳卷三十五

清四

吳英字爲高泉州人後入莆田籍早孤值海盜搶掠用將才起家隨大師克平金廈功授都司僉書隸浙江提標歲甲寅三藩並興耿精忠軍出仙霞駐金衢旁入江西鄭氏響應東南震動或聞英閩人不可信提督塞獨深契之授英左營遊擊英奮勵甫視事三日退寧海梅坑賊進兵雙門解台州圍復破水賊張拱垣於三門港殲爲帥朱飛熊于毛頭洋軍氣大振既鎮藍旗貝子到浙視師提督首薦英卽命爲前鋒引兵揚言修毛坪路陰襲涼棚取之斬賊帥劉邦仁遂復黃巖貝子奇之尋令復太平樂清等縣抵土塘遇賊兵二萬眾奮擊之斬數千級賊帥許奇保殘卒據綠帳陽河而陣英下令人負草一束夜乘潮填河而濟大破之遂由猴孫嶺奪其堡引大兵直至青田僞將連登雲以十萬圍處踰二載聞青田破餉道阻絕遂夜遁有曾養性者耿之臬將也時擁大兵據溫乘大兵初至分五路

夜來燒營英急白貝子令諸軍棄營據險軍以不亂自率精兵據大羊山
阻其要道復請分兵五百抄伏敵後是夜賊冲殺數四英力戰達曙身中
數創士不傷者才五十人天明單騎突之大師繼進伏兵並起賊自相踐
踏斬獲無算逐之至溫州城下銃傷馬顛復奮起刃十餘人奪賊馬以戰
貫其眾由將軍橋以歸初貝子收兵失英所在大駭既見喜且泣曰以一
身當數萬眾戰終夜不殆神衛汝耶是役也曾養性僅以身免耿氏精銳
盡矣未幾還守寧波中軍適賊船二百餘艘直臨定關英偵得定關守備
方俊受僞劄爲內應請提督立斬以示賊賊遽退守象山英復請兵破之
旋奉檄收捕大嵐山寇搜斬數百人餘黨潰散時耿已輸誠而松陽遂昌
山寇游魂出沒貝子駐師石塘召英捕之賊首馮公輔屯戴火山素韻英
威名出就撫其別魁林惟仁黃大相等擁眾黃鼻山左倚懸厓右臨深潭
以獨木爲橋山廣袤數十里莫可蹤跡前督撫遣人招之輒爲所殺英令
諸軍持三日糧夜腰繩魚貫上席草而下至楊梅灘遇賊破之降其眾山

寇悉平而鄭氏復熾陷海澄困泉州斷洛陽長橋以阻援兵英以副總兵
官從康親王救勦自仙遊分兵兩路由閩道解泉圍奪江東橋守之破砦
十有九遂復海澄已未秋擢同安總兵官明年率舟師合大軍進攻金廈
鄭氏棄兩島遁回臺灣會靖海侯施琅來提督海疆事議進攻澎臺引英
自助英謂琅曰公與海上有父子弟姪之仇今日之事爲國靖難不挾怨
殺降英敢不惟命琅從之遂以癸亥六月某日發銅山取八罩直抵澎湖
鄭氏勢盛前軍被圍英單船拔出之翼日進攻殺其先鋒燒其船英所乘
船忽爲潮水衝著石上敵船火烈將及副將詹六奇駕小舟挽英避再三
英以眾軍在船義不獨存堅却之船忽浮起士氣益厲戰彌力鄭氏大敗
燬其船百九十餘艘殲其官將三百餘員殺溺兵五萬計俘者皆縊迫使
歸諭以恩信禍福整眾臨之鄭氏勢窮納款舉土降施琅凱旋留英鎮撫
其地尋調鎮舟山海寇洪煥等一千餘人聞風歸命再擢四川提督破吳
三桂餘黨楊善帥九經等散其眾川中游經兵燹于村荆杞伏莽竊發英

嚴塘汎懸賞購募獲積盜三百餘人斃其魁六十三人於杖盜賊屏息鎮蜀十有一年施琅既卒上念閩海反側非宿將莫能鎮壓遂調英福建陸路提督旋改水師凡十餘年前後如京師者再御書作萬人敵四字以賜加號威略將軍優以世職請老不許終於位贈太子少保子十人應麟布政使司叅議江西督糧道應龍刑部郎中應鳳康熙壬午舉人戶部郎中江南廬鳳道應鵬福建水師提標遊擊應鵠康熙辛巳舉人廣西灌陽知縣應鵬襲世職曾孫元柱字馨治襲世職授廣東雷州叅將穆堂初稿臺灣志畧道光

舊志

黃性震字元起漳浦人年十二父母俱喪艱於謀生然有大志讀史遇豪傑崛起事聲色俱動隱然自負年既壯益練習當世事時鄭成功竄居臺灣性震於閩安要衝澎臺形勢凡澄议險易島嶼出沒及戰情向背一一熟悉于胸久之謁閩督姚啓聖於軍門條平海十便姚用其策相與密謀遂平臺灣其策首言兵法攻心鄭氏祖孫父子踞海識形便臺灣天險誠

難爲力今鄭經濁酒色子幼明將不一心倘能不慄官爵金帛攜貳其黨
披其腹心賊易易平耳姚稱善曰此陳平所以號項籍也吾以此委君矣
性震曰未也鄭今新陷海澄數勝而驕驟撫之是不弱也宜伺間出奇大
挫其鋒收諸要地以蹙其勢師要地蹙孤島難恃然後撫而懷之其心乃
離澎臺可一戰下也姚曰此項籍所以降章邯也稱善久之於是出龍虎
山復長泰縣大破鄭兵於西溪奪江東橋水晶坪等處性震曰可以撫矣
乃大開修來館於漳州來降者予官服車騎卽亡無所聞卒有亡入鄭氏
者皆誘示所有則皆心動謀至密飭諸營厚歎之諜卽以情輸戰有日矣
或填館舍盛供具大書某鎮某官公館聲言某月日某將當來降鄭黨
猜貳歸者日眾勢日孤官軍一鼓而下十九塞遂復海澄克廈門金門經
遁歸臺灣身死于克城澎湖一戰面縛海寇平諸將克金廈門時議悉讞
鄭黨而以其子女資財犒軍性震密白姚申禁令全活數十萬眾先是總
督上性震功廷議以同知用奉優旨以僉事道用至是授霸昌道擢廣西

按察使尋擢湖廣湖南布政使以病乞休家居七年再起總理永定河工竣晉太常寺卿卒于真定官霸昌時其地滿漢雜處故多闖馬劫掠性震陰遣吏入盜夥廉其姓名巢窟悉擒治之旗丁重責剝人至沒入其妻女性震下令聽民贖回不從者置之法咸震驚無敢犯官廣西時適遇大容山叛案辭連高廉羅肇潯梧柳慶八郡獄幾滿性震擬斬巨魁崔枝玉等餘省釋屬天寒男婦計口授衣市中布爲一空歡呼聲動天地總藩湖南時值武昌夏逢龍亂已陷四府廷議方出京軍上曰湖南有黃性震在彼能佐平數十年海氛何愁么麼跳梁輩且襄陽有總兵蔡元一人必能了之蔡元者破吳三桂時有功者也時撫軍亦議請兵性震謂用兵如治亂絲綏之則其緒自清急則禁矣今第靜鎮以安眾心俟賊焰少熄撲滅之一偏裨力耳何爲張皇以生四方伏莽之心哉未幾賊果破逢龍誅死其總理河務也治法五里設一旗一礮旗書監督人姓名有令則發礮遠近聞聲馳赴士卒各下堵塞埽料則隱然以兵法部署也前此數年績弗成

者四閱月訖工居鄉修文廟明倫堂置義學田租爲邑士科舉公車之費
復建文昌祠敬一亭修梁山鍾秀坊濬泮池傅公河浦自前明以來人文
甲于漳郡形家謂以雙溪二壩收碧山梁山諸水朝宗城下後年久壞壞
一水背流氣運稍減今欲興復其故需費二千餘金性震毅然肩之獨力
填築疏通內河俾諸水仍舊朝宗家居故在湖西先世所聚族者兵燹後
零星散處鳩工庀石築土堡爲藩籬俾族眾咸有寧居中立大宗廟以示
報本次立小宗廟聯五服之親各置祀田租千餘石以蒸嘗立義塾令閭
族讀書其中置書田租四百石爲贍脩膏火之資復置義田租八百石以
贍族中冠婚喪祭孤寢貧窮無告者仲兄都司僉書性昂遠居蜀沒已久
遺人挈其家扶櫬歸葬功兄太學生性祥久居粵亦爲挈家族里授宅分
產兄沒爲置祀田凡羣從兄弟之子皆視若已子婚娶田宅次第均分好
扶植單寒海寧學士查昇未遇時一見如舊相識不惜千金資其成立四
方名士登門締交或延爲諸子師優其束脯卒年六十有五

鹿洲初集
歸愚文集

案全祖望撰姚啓聖神道碑謂性震以道士自鄭氏來降復入臺以計閒劉國軒於克塽未詳確否

吳郡字雲士其先鳳陽人祖高明季官京衛指揮使李自成逼京師與父貴及家屬七人同日殉難郡時年八歲同老僕逃至閩省及長贍力絕倫落魄汀泉間後乃居浦城會海疆未寧乃仗劍從軍康熙癸亥六月隨施琅攻取澎湖澎爲臺門戶敵之精銳聚焉郡隨舟師夜衝敵船敵發大驚賈勇而前火矢交攻敵艘被焚覆溺投水者無算官兵乘勢夾擊遂攻克澎湖進攻鹿耳門乘勝直逼臺城七日而鄭克塽卒眾歸降敘功十九等加左都督銜補授山西大同鎮標遊擊嘗從鎮將俞某出殲鉅龜一虎躍詭神勇俞提督湖廣奏郡與俱旋補天柱營參將將軍席某督兵征紅苗命郡前驅同破天星縣落愁歎諸砦苗思平郡以天柱界接滇南彝民雜處易構奸因椎牛饗士耀以兵威使知畏戢苗民苦雜派夫徭會同有司禁革俾嗣後皆自雇募苗人悅服鎮將疏薦擢黃州協副將調廣東香

山協廣東大盜東瓜三出沒海島爲民患郡請寬其罪使捕盜自效又賊有花芋芳船身窄而長可容三四十人涉水如飛歸則沈諸水底郡嚴稽察禁出口盜無所容皆遠遁四十七年陞浙江定海鎮總兵駐軍舟山相度機宜添設兵船於倒斗澳長途雙合山兩頭洞等處蚤夜巡防凡商賈往來必護送過境舟山民結茅而居易罹火患郡設撲火具火發立救滅次年閩省告饑朝廷命截留江浙漕糧賑濟郡請自僦商船與子興業分途運送自乍浦起行不半月五萬石米齊集漳泉民喜更生旋署松江提督五十一年擢浙江水師提督簡練士卒葺墩臺勤巡緝念洋盜爲患多內地奸民爲之耳目因指陳近海居民惡習四條移咨督撫通飭嚴禁又以水師非熟練者未克奏效舊例遊守以下因公署誤輒停陞轉因疏請遇有水師員缺許破格揀用既得請人人皆感激奮勵踰二年卒於官予至祭葬授榮祿大夫加贈太子太保謚武寧從祀昭忠祠

菊古堂文集

子興業字鄧侯以海運功拔把總康熙五十一年勦海盜陳尙義黨張四

許懇於鳳尾洋尙義懼詣郡乞降總督覺羅滿保知興業諳水師命從捕海盜陳君元君元竄廣東洋追獲之丁父艱服闋以貲授治中知山東東昌府時豫省河決運道傾圮東昌所轄州縣五百餘里伐木通舟皆沿河居民充役又值歲歉民力不堪興業捐廉錢給役食民皆踴躍趨事運船北下者得以無滯李海務運河決口與業謂不亟防麥必遭漂沒又捐俸募夫堵築堤成而麥大熟檄往魚臺縣開濬運河魚臺屬兗州興業不分畛域以督工爲已責上發帑金數十萬賑災民興業招徠流散更捐貲增設男女兩粥厰於聊城以聊城以聊城勘不成災未經題請也擢分守濟東泰武臨道值邱縣風災蒙恩賞給窮民籽粒興業路遇流亡者皆捐給口糧令歸耕後以失察被議請歸養母嗣丁母艱遂絕意仕進傷遊林下者三十餘年年八十卒孫光祖輝祖

光祖字紹衣以例授廣西上林恩知縣調慶東河源又調始興會海盜劫掠爲澳門患上官知其能改知香山縣至則捕巨盜梁亞卿等三百餘

人明年又捕得胡應南賊黨四十餘人敘功擢瑞州府同知遷惠州皆以勤職聞

輝祖字念庵以例授士田州州同擢知直隸祁州還順天府西路同知調南路同知嘉慶五年大水率屬分賑民無失所擢知天津府卒於官

道光舊志

阮蔡文字子章號鶴石漳浦人父曰魁以海氛遷徙之江西生蔡文於南昌蔡文年十一能屬文然性剛以膂力自負喜弄刀盾隣兒皆畏下之十

三補新喻諸生以貧甚隨父耕作父購得蠹壞綱目授之讀冬無絮蔡文

攜斧劙樹根累百斤者負歸坎地熟而圍之父歿教授村童以養其母二十

四舉江西庚午鄉試數上春官不第留心經世所至南北山川阨塞險

易沿海島澳以及東南諸蠻夷情狀利害無不瞭於胸中齊語楚咻吳越

閩廣方言苗猺侏僪之音入其鄉即與之化肖其聲調莫能辨者與武人

吳郡交相善蔡文族父欽爲台州副將拜廩行總兵官偕郡往依之蔡文

任書記郡爲小校兩家母通往來郡事蔡文父母如母郡母亦視蔡文如子

未幾蔡文以母歿扶櫬還浦時浦令陳汝咸率邑人爲講經之會月兩期
蔡文前席高論古人治亂得失教時急務同學聽之丙戌後讀書都門已
丑被放南遷抵三山閩撫張伯行邀入鼈峰書院講洛閩之學分纂先儒
諸書或勸還家五載宜速歸蔡文曰正學失傳久矣斯會可多得耶顧吾
方謀葬母亦當歸耳明年漳泉諸郡饑蔡文將有姑蘇之行傾囊以資旅
人之在鄉者謂其子曰吾非不念汝曹顧此皆吾祖宗之子孫吾與汝同
源其本者也脫不舉火非填溝壑寧免散之四方哉時吳郡已爲定海大
帥詔截江浙漕米三十萬石由海道入閩分賑蔡文自姑蘇趨如浙偕吳
郡分運五萬石揚帆先至漳泉之人賴焉壬辰冬十月海賊陳尚義遣其
黨赴兵部乞降時陳汝咸爲御史奏請自往招撫薦蔡文與俱詔御史駐
錦州賜蔡文帑金衣裘偕子總駘南左其彪等入海遇颶風大作駘南一
船翻失不知何往蔡文船折檣幾覆數四舟人大恐蔡文怡然曰我等爲
朝廷招逋寇靖海疆雖葬魚腹不猶愈死兒女子手耶至登萊面上賊艘

見尙義開示威信陳說利害卒降之由寧波登岸則吳郡已爲浙江提督遣官弁護至京師召見便殿上問蔡文書生此行良苦頗驚怖否更問沿海事宜條對甚悉議功晉州牧選雲南之陸涼未行改授福建廈門水師中營叅將則以蔡文材武可大用大學士李光地亦奏稱其猷畧故也在廈門通關梁除盜賊動合兵民意紅彝市舶故驕橫王者貪其利多爲所玩一日互市爭價至一船拔刃以譁軍吏惶急不知所爲蔡文單騎往縛譯者榜之爲平其直皆羅拜次日其酋率眾謝明年調臺灣北路營叅將諸羅令周鍾瑄才名吏治爲海疆冠蔡文和衷共濟戢吏卒撫番黎捐金助建學宮城隍悉除所轄陋規部伍器甲簡閱整齊躬巡歷沿海增置要害營汎北路地方千里半線以上民少番多大肚牛罵呑霄竹塹諸處山川奧鬱水土苦惡南崁淡水窮年陰霧罕晴霽硫黃所產毒氣薰蒸鄭氏以投罪人庚寅始設淡水防兵更番生還歲不能三之一巡哨未有至者蔡文決計往部曲皆涕泣諫止蔡文曰臺雖彈丸實閩之安危淡水又臺

之鍵鑰也由淡水至福州利風一日可達民番錯雜亡命者日多不孰知其道里情形何以控制調度自齋帳落具脯糒日或於馬上成詩夜燃燭紀所歷地里山溪風候土俗爲文以祭陣亡諸將士悽愴激烈聞者感泣山谷諸番具牛羊酒食迎餉道旁悉慰遺無所受召社學番童坐幕下與之語曰我汝師也勿懼能背誦四書者旌以銀布爲講解君臣父子之大義反覆不倦諸番皆感悅竟以中瘴氣歸而病痞遷福州城守副將赴京道劇卒於宿遷年五十蔡文偉軀幹黝面潤口好劇談大笑鬚眉皆動讀書忘寢食爲文章不假思索然其志在經濟事業故著述無多所遺淡水諸作南北海道盡山花鳥等記耳子道泰傳見孝義藍鼎元
撰傳

陳子威字其畏閩縣人邑諸生父希元字君首籍侯官生員順治十三年避海寇遷居於鄉慨然曰吾豈忍自爲一家計乎乃設策守禦居民賴以保全有爲賊擄者解囊贖歸之寇退復助木石治廬舍爲鄰里謀完聚焉康熙十七年海寇復擾子威與其叔君翼獻策軍門曰寇所恃者沿海之

人爲之耳自故噶張豕突猝不易制若聯絡海上漁艇斷其聲援賊不難
擒矣巡撫吳興祚善其言令詣康親王備陳內地奸宄遂招募鄉勇澳民
三千建聯絡營給聯絡僉事道劄所在剿捕歷著戰功克復金門廈門臭
望澎湖招撫臺灣等處興祚上其事授南韶道遷涼莊郎裏叅政致仕歸
者有嵩山詩集五涼治績考君翼閩縣貢生授聯絡通判劄擒僞都督章
元勳追殺僞將王亮歷戰有功卒於軍子瀛襲授金華府通判

福州府志

陳忠義字君升福清人康熙十三年耿逆變作以按察司僉事從康親王
平浙恢復處州衢州二府常山等縣加左都督賜蟒服改授薊州鎮總兵
官三載卒賜祭葬蔭一子

江洪琯字人瑞福清人漳州鎮韓某器之延參軍事耿逆之變琯遁迹海
澙耿逆既敗海氛未靖琯與鎮帥某謀守城迎大師敘功加副將銜任興
化鎮右營遊擊以剿金廈功調金門鎮子良潮任南海縣巡檢

蔡璋字秉誠晉江人值吳逆之亂力拒僞檄後以平臺功授職屯興國田

從征建昌大小數十戰累功授南昌總兵移撫州克復金谿復勦龍泉廣信崇安光澤諸賊嘗以數千人破黃通賊數萬移鎮廣東順德賊憚其威名不敢犯逾年簡舟師出不意勦謝昌等於海陵傾其巢穴賊走海犯瓊州璋率師渡海迎潮擊其尾焚其巨艦斬獲僞官兵等六百餘級救被擄女子三千餘人貲遣還家賊潰登陸掩擊於五指山大敗之復破殘寇於十字門瓊州平璋亦以勞卒先是璋之泣順德也以大鼓置门外弁兵有索詐者許民擊聞擒治民感其德及疾民爭禱於神卒之日罷市巷哭七日

蘇虎臣南安人武生康熙十六年從提督段應舉克復同安海澄授千總擢分備又同興化遊擊陳永茂征李復貴陳申等擒平賊穴十七年從提督楊捷征鳳山十九年克復觀音山十九寨及海澄廈門二十年授都司兼從水師提督施琅出海攻克澎湖三十六島臺灣平敘功授左都督興化副將同縣李智亦以平臺功授總河中軍副將擢南澳總兵林廷字伯